

**■ PUNTO DA VISTA**

# Tailas cotschnas per tiradurs e lingias cotschnas per Schengen

DA CLAUDIA CADRUVI / ANR

La disfidanza è enorm gronda tar tiradurs e chatschadurs. Per pudair restar en il territori da Schengen sto la Svizra adattar sia lescha d'armas per restar cumpatibla cun l'Uniuin europea (UE). Lezza ha midà sias directivas d'armas suenter crudavels attentats terroristics. Sche la Svizra refusa in'adattaziun, surpasa ella ord vista da l'UE ina lingia cotschna. Lura po la Svizra vegnir bandischada dal territori da Schengen. Quai avess per consequenza ch'ils visums da turists na valan betg pli per la Svizra e la polizia svizra n'avess nagin access pli al sistem d'infurmaziun da Schengen.

Per ils tiradurs u ils chatschadurs muntan midadas tar la lescha d'armas ina taila cotschna. Els tegnan char lur schluppet ch'els dovran l'atun per far chatscha u la buis ch'els tgran per ils cumbats en il stan da tir. In tiradur na less betg esser sfurzà da stuair registrar sia arma. El na less betg vegnir cri-

minalisà sch'el emblida d'annunziar ina buis. El resenta talas mesiras sco schicana e sa senta tractà sco in malfatschent suspectà. Igl è ina tenuta sceptica e disfidanta visavi mintga midada.

Il giavisch da tiradurs e chatschadurs che tut restia sco fin qua è chapavel. Fin uss hai gea funcziunà pulit bain cun nosa lescha d'armas ch'è pir avant paucs onns vegnida revedida. Ma èn la sceptica e disfidanza visavi las adattaziuns a l'UE insumma giustificadas? Atgnamain betg. Per ils chatschadurs e tiradurs na sa mida tant sco nagut. Tgi che fa regularmain ses exercizis da sajettar survegn en mintga cas la lubientscha per sia buis. Ed era tgi ch'è commember dad in'uniun da tir na sto temair nagut, pertge el ha il dretg d'obtegnair la lubientscha per ses schluppet.

Er en il cussegl dals chantuns hai dà ina scena ch'illustra exemplaricamain la disfidanza nungustificada visavi las adapta-

ziuns da la lescha. *Werner Hösli* (pps/GL) sco era *Peter Föhn* (ppsl/SZ) han battì cun verva per veterans da l'armada. I saja nunchapavel ch'ins sforzia umens da passa 80 u 90 onns da registrar l'arma d'ordonnanza. I sa tractia da glieud fidada ch'haja per part perfin fatg servetsch activ. Questa generaziun na vegnia savens betg a frida cun portals d'internet e na saja perquai betg en stan da registrar a moda electronica in'arma. Föhn ha perfin declamà ch'el sez na vegnia mai a registrar sia arma – era sch'el daventia lura criminal.

Il votum emozional è vegnì franà da la ministra da giustia *Simone Sommaruga*. Ella ha fatg attent che las armas che la schuldada ed ils uffiziers surpiglian a la fin dal servetsch militar na tutgian betg tar las armas scumandadas. Ellas na stoppian pia gnanca vegnir registradas. L'entira agitaziun è pia stada per il giat.

La pitschna episodio dad ier mussa che blers amaters dad

armas sa chalireschan memia spert. Empè da vesair tailas cotschnas e giuditgar cun testa chalirada fissi inditgà da leger cun spiert temprà tge che stat propi scrit en la lescha. Numnadamain ch'i basta il trenament regular cun la buis u la commembranza en in'uniun da tir per obtegnair il permis per il schluppet. E sco ditg: L'arma d'ordonnanza è legala e na dovra gnanc lubientscha.

Durant questa sessiun d'atun deliberescha il parlament las adattaziuns da la lescha d'armas. Ch'amaters dad armas prendan il referendum è tant sco segir. Tuttna fissi prudent sche quests tschertgels ponderassan anc ina giada sch'igl è propi inditgà da s'opponer. Il schuz pudess manivel ir davos or. Il pievel vegn – tar tutta simpatia per chatschadurs e tiradurs – strusch a periclitir in uschè impurtant contract sco quel da Schengen mo pervi da pitschnas adattaziuns che na fan, sch'ins legia precis, propi mal a nagin.